



N°6617
Entrée le 05.08.2022
Déclarée recevable
Président de la Chambre des Députés
(s.) Fernand Etgen
Luxembourg, le 05.08.2022

Fernand ETGEN
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 05/08/2022

Här President,

Sou wéi den Artikel 80 vun eisem Chambersreglement et virgesäit, bieden ech Iech, dës parlamentaresch Fro un d'Ministesch fir Gesondheet weiderzeleeden.

An der Äntwert op meng parlamentaresch Froen n°4931 hat d'Ministesch erkläert, dass 5 Services de Psychiatrie hei am Land existéieren. Dës Servicer befannen sech am CHEM zu Esch, dem CHL an dem HRS zu Lëtzebuerg an dem ChDN souwéi dem CHNP zu Ettelbréck. Statistiken zu de Patienten géifen net zentral erfaasst ginn. Deemno misst et jo méiglech sinn, dass all eenzel Psychiatrie dem Ministère verschidden Zuehlen nenne kann.

An deem Zesammenhang wéilt ech der Ministesch dës Froe stellen:

1. Wéi vill Persoune schaffen aktuell an de Psychiatrien hei am Land, opgelëscht no Psychiatrie? Wéi vill dovunner si fest an deenen eenzelne Psychiatrien agestallt?
2. Wéi vill Psychiateren a Psychologen mat engem Doktertittel schaffen aktuell an de Psychiatrien hei am Land, opgelëscht no Ustalt? Wéi vill vun dësen Doktere si permanent an deenen eenzelnen Ustalten affektéiert?
3. Wéi schnell müssen d'Psychiateren a Psychologen, am Fall vun enger Urgence, an enger Psychiatrie fir de Patient do sinn?
4. Wéi vill Persounen sinn aktuell an den eenzelne Psychiatrien hei am Land hospitaliséiert? Wéi vill vun dëse Patienten sinn zwangsinternéiert iwwert d'Gesetz vun Dezember 2009?
5. Wéi vill Patienten waren an de leschten 2 Joer an der Moyenne pro Mount an de Psychiatrien hei am Land zwangsinternéiert nom Gesetz vun 2009 (opgelëscht no Mount)?
6. Existéieren aner Zwangsinternementer ewéi déi, déi am Gesetz vun 2009 virgesi sinn?

Mat déiwem Respekt,



www.piraten.lu



GOERGEN Marc

Député



www.piraten.lu



Gemeinsam Äntwert vun der Madamm Gesondheitsministesch an der Madamm Justizministesch op d'parlamentaresch Fro n° 6617 vum 5. August 2022 vum honorabelen Deputéierten Här Marc Goergen.

1. Wéi vill Persoune schaffen aktuell an de Psychiatrien hei am Land, opgelëscht no Psychiatrie? Wéi vill dovunner si fest an deenen eenzelne Psychiatrien agestellt?

D'Prise en Charge vum engem psychiatreschen Patient ass multidisziplinär an betrëfft dofir eng Unzuel vun verschiddenen Beruffer ënnert anerem d'Dokterschaft, Fleegepersonal, Psychologen, Assistantes sociales, Psychomotriciennes, Ergotherapeuten, Sport-, Musico- an Artherapeuten, déi all entweder vum Spidol ugestallt sinn oder eng Konventioun hunn. Infirmière psychiatrique sinn beim Fleegepersonal een vun den Haaptpillere, déi Prise en Charge garantéieren nieft den Infirmier général an Aide-soignants.

Et muss een, wat Dotatioun vun der Prise en Charge betrëfft, och zwëschen der Erwuessenpsychiatrie an der Jugend- an Kannerpsychiatrie ënnerscheeden. Eleng de CHEM huet ob sengem Site zu Esch eng „Psychiatrie intensive“, en „centre de crise“, eng Antenne mobile“ an en „Hôpital de jour “ esou wie ob sengem Site zu Niederkorn zwou Psychiatrie-médecine interne an eng Psychiatrie de liaison, all des Servicer hunn hier eegen Dotatioun.

D'ETP vun deenen verschiddenen Servicer an den Psychiatrien ginn mat der CNS an dem betreffenen Spidol an eenzelen ausgehandelt, dat baséiert op Normen an op dem Aktivitéitsbilan vum Spidol. Mir verweisen dofir un den Ministère fir sozial Sëcherheet an am bestëmmten un d'Kommissioun des normes FHL-CNS. An dësem Dokument ass virgesinn dat Dotatioun de sécurité zum Beispill fir d'„unité de psychiatrie fermée“ drai soignants pro Posten 365/365 Deeg ass.

2. Wéi vill Psychiateren a Psychologen mat engem Doktertittel schaffen aktuell an de Psychiatrien hei am Land, opgelëscht no Ustalt? Wéi vill vun dësen Doktere si permanent an deenen eenzelnen Ustalten affektéiert?

Wat den HRS, CHEM an CHdN ubelaangt, schaffen do d'Dokteren als Fräiberuffler an sinn un d'Spidol duerch en Contrat de collaboration gebonnen (Belegarztsystem). Am CHNP an CHL sinn d'Dokteren ugestallt an sinn „médecins salariés“. Fir déi ugestallten Dokteren ginn d'ETP och mat der CNS ausgehandelt. Niewent spezialiséierten Dokteren an der Psychiatrie sinn awer och nach Psychotherapeuten am Kontakt mam Patient. Doniewent gëtt awer hautdesdaags vill op zousätzlech Formatiounen an Experienzen gekuckt, fir kennen an enger „Psychiatrie“ ze schaffen.

3. Wéi schnell mussen d'Psychiateren a Psychologen, am Fall vun enger Urgence, an enger Psychiatrie fir de Patient do sinn?

Fir hospitaliséiert Patienten huet ee Psychiater an all Klinik 24 Stonnen op 24, 7 Deeg an der Woch Bereetschaft. Och gëtt d'Personal duerch Formatiounen ausgebild fir esou Evenementer op e maximum ze évitéieren. D'Zielsetzung bleift d'Urgences op een maximum ze vermeiden duerch Formatioun vum Personal.



4. Wéi vill Persounen sinn aktuell an den eenzelne Psychiatrien hei am Land hospitaliséiert? Wéi vill vun dëse Patienten sinn zwangsinternéiert iwwert d'Gesetz vun Dezember 2009?

Am Rapport vun der carte sanitaire vun 2021 sinn Unzuel vun de Better beschriwwen:

Wat déi véier Akutpsychiatrie Servicer ugeet, sou sinn am CHdN-Ettelbréck 41 Better, am CHL 48 an am CHEM 45 Better installéiert (27 CHEM-ESCH an 18 CHEM-Nidderkuer). Et ginn 92 Better am HRS dovun 45 am HRS-Kierchbiérg, 32 an der Zithaklinik an 15 an der Clinique Ste Marie. Am ganzen ginn et soumat 226 Better am Land an den Akutpsychiatrie Servicer.

Wat den CHNP ugeet sou ginn et 180 Better de „moyen séjour“ an 67 Langzéitbetter.

Waat d'Better vun der zouener Psychiatrie betrëfft, ginn et der jeeweils 12 am CHEM, CHL, CHdN an HRS esou wie 15 am CHNP. Wat « Services nationaux » ugeet, sou hunn mer fier d'Kannerpsychiatrie 8 Better an der CHL-Kannerklinik an 30 Better fir d'Jugendpsychiatrie an den HRS-Kierchbiérg. (D'Beleeung vun deenen eenzelen Servicer ass immens héich.

Am Mount August vun dësem Joer waren insgesamt 48 Patienten iwwert d'Gesetz vun 2009 placéiert.

5. Wéi vill Patienten waren an de leschten 2 Joer an der Moyenne pro Mount an de Psychiatrien hei am Land zwangsinternéiert nom Gesetz vun 2009 (opgelëscht no Mount)?

Nombre de placés judiciaires par mois sur base de l'article 71 du Code pénal

	Janvier	Février	Mars	Avril	Mai	Juin	Juillet	Août	Septembre	Octobre	Novembre	Décembre
2021	44	44	44	45	45	44	44	44	43	43	43	43
2022	42	42	42	42	45	47	48	48				

6. Existéieren aner Zwangsinternementer ewéi déi, déi am Gesetz vun 2009 virgesi sinn?

Den Artikel 71 vum Code pénal gesäit en Zwangsinternement vir, dee vun de Justizautoritéite kann ordonnéiert ginn am Fall wou eng Persoun eng Strofdot begaangen huet, mee als onzourechnungsfähig („pénalement irresponsable“) a geféierlech fir sech a fir anerer erkläert gouf. Dëse Placement kann natierlech och mat engem Appel oder enger Oppositioun ugefecht ginn.

D'Modalitéite vun der Exekutioun vun dëse Placementer sinn awer vum Gesetz vun 2009 virgesinn.



LE GOUVERNEMENT
DU GRAND-DUCHÉ DE LUXEMBOURG
Ministère de la Santé

Lëtzebuerg, den 11. Oktober 2022

D'Gesondheitsministesch

(s.) Paulette Lenert